



Aqqalu C. Jerimiassen

UKA 2023/77

Atassut

19. oktober 2023

Pinngitsaaliilluni angerlarsimaffiup avataanut inissiinernut atatillugu innuttaasut eqqartuussissuserisumik ikiorneqarnissaat aamma meeqqat inissinneqarnerannut atatillugu atugassarititaasut, innuttaasut suliap ingerlanerani toqqissisimanermik qulakkeerinniffiginissaat aamma inuit pisinnaatitaaffiannut eqqartuussivimmumt maalaaruteqarsinnaanermik periarfissaqarnissaat pillugu apeqquteqaat aallaavigalugu oqallinnissamik siunnersuut.

(Siumut)

Kinaluunniit eqqunngitsumik pineqaruni, naapertuuttumik iliuuseqartoqartariaqarpoq – pingaartumik meeqqat pineqartillugit. Meeqqat amiilaarnavissunik misigisaqarsimappata sumiginnagaasimappatalu annertuumik pisussaaffeqarpugut piaarnerpaamik iliuuseqarnissamut. Soorunalimi kinaluunniit pisinnaatitaaffeqarpoq – allaammi aamma pinerluuteqarsimagaanni.

Eqqaamassavarpulli kikkut illersussallugit pingaarnerpaajunersoq. Meeraq tamatigit pingaarnerpaajuvoq. Taamaammallu aamma iluamik naliliisoqartarnissaa pingaarutilerujussuvoq. Isumaqarpugulli naliliisoqareernerup kingorna suliaq annertusarlugu eqqartuussissuserisunut suliakkiisaqattaqqinnissaq aaqqiinerunavianngitsoq.

Ajornartorsiutip aallartiffia aaqqinniassallugu pikkorinnerusariaqaraluarpugut. Siunnersuuteqartummi kukkuluttornikkut naliliisoqartarnera ajornartorsiutitut taavaat. Naliliinerliortoqassanngippat isumaginninnermut siunnersortit massakkut ikippallaartut amerlisarneqartariaqarput naliliinissaminnut piffissaqarnerullutillu nukissaqarluarneruniassagamik.

Meeqqammi angajoqqaaminniit arsaagaasarnerat imaannaanngitsorujussuvoq, imaannaanngitsumillu aalajangiisoqartariaqartarluni piffinniit assigiinngitsuniit kommune tusarlerneqarsimagaangat, meerannguillu qanoq aqquusaagaqarsimanersut apeqqutaalluni suliaq aallartittarluni. Angajoqqaallu periarfissinneqaaqqaartarput aaqqiissuteqarnissaminnut, allangortoqarsimannikkaangallu ajoraluartumik meeqqat angerlarsimaffiup avataanut inissinneqartariaqartarlutik.

Ajoraluartumillu oqartariaqarput. Nunatsinni angajoqqaajuneq akisussaaffeqarnerlu pikkoriffiginerulertariaqarparput. Siunnersuutigissavarpullu aningaasat pinaveersaartitsinernut atoruninnerullugit, inunnillu isumaginninnermut siunnersortit amerlilertornissaannut aningaasat atussagigut innersuukkusullugu. Taamaalillutami aamma meerannguit angerlarsimaffimmini atugarliortut naammattoorneqanngitsoortartullu iliuuseqarfiginerulersinnaavagut.

Meeqqat angerlarsimaffiup avataanut inissinneqartarnerat ajornartorsiutaanngilaq.
Angajoqqaajunerlunneruna ajornartorsiutaasoq. Kukuluttortumillu naliliinerliortoqassanngippat
naliliisartut sulissanik ulikkaartut oqilisaaffigisariaqarpagut inulerisunillu amerlanerusunik
peqalernissaq sulissutigalugu. Tassa aaqqiissutissaq.